

ERIC D'ARNAULT LO SIGUI NA CABEZ DI TOPCAR N.V.



ORANJESTAD(AAN) -- Relaciona cu e 25 aña di existencia di Topcar N.V., DIARIO a entrevista e conocido Eric d'Arnault.

Manera ta conoci, algun luna pasa durante un confer-

encia di prensa d'Arnault a firma un contract pa ampliacion di Topcar N.V.

Despues di a firma e contract, d'Arnault a duna un noticia cu a cay manera un baño di awa friu pa hopi di esnan

presente na e conferencia y den comunidad.

E noticia cu d'Arnault a duna ta cu e lo no bay ta mas na cabez di Topcar y lo pasa e responsabilidadnan pa e team cu el a prepara pa añas y cu e tin confianza cu e team lo sa di hiba un bon maneho.

DIARIO den e entrevista exclusivo cu d'Arnault a haya sa cu en realidad d'Arnault a pasa responsabilidadnan pa e team pero e lo keda duna consehonan valioso na e compania. Den e combersacion cu d'Arnault DIARIO a haya sa un parti chikito di su historia, esta con el a lanta, crece yega te caminda e ta actualmente.

Eric d'Arnault a nace den Rancho den un di e casnan di difunto Dun Dun Ecuri. Ora el a haci 1 aña, nan a muda y d'Arnault a bay biba den Companashi caminda el a lanta.

Su tata Jack d'Arnault tabata traha na Eagle y su mama mihor conoci como jeffrouw Jet tabata duna les na Magriet School.

Eric d'Arnault a indica cu e tempo ey Companashi tabata e bario di Aruba. Ta den Companashi famianar manera Toppenberg, Escalona, Ras, Solognier, Jacobs, Koffie, Tromp Montaner, Arends y d'Arnault a lanta y ta nomber di famianan cu te ainda bo ta tende rond di Aruba.

d'Arnault a bay Sint Dominicus College y e ta masha gradecido na e frerenan kendenan tabata percura pa un sifia respecta y sifia su lesnan. El a indica cu den cercania di Companashi tabatin e veld di RCA, tereno di futbol, terenc di beisball, cancha di Tennis, etc.

E grupo di Verkenner, Sint Franciscus Groep tambe tabata di Companashi y tabata un di e mihor gruponan. d'Arnault a bisa cu un di su mihor amigonan cu awe no ta mas hunto cu nos, difunto Miki Tromp, tambe tabata forma parti di e grupo di Verkenner Sint Franciscus Groep.

Ora d'Arnault a caba MULO, el a opta pa sigui studia. El a bay sigui su estudio na Dribergen na Hulanda. El a sigui su estudio na IFA Instituut voor de auto Handel. E tempo ey tabata hopi dificil pa bay sigui studia na Hulanda ya cu famia d'Arnault tabata consisti di 5 ruman y e mayornan tabata di poco recurso.

Apesar di e poco recurso,

despues di dos aña d'Arnault a gradua y a traha tres aña na Hulanda pa sifia e parti practico.

E PROMER PELOTERO ARUBIANO DEN TOP BEISBALL NA HULANDA

d'Arnault, ademas di a demostra cu e por sifia bon, tabata un gran atleta.

E tabata hunga futbol y beisball na Hulanda. Ta asina cu d'Arnault tabata e promer Arubiano/Antiyanu cu a hunga top beisball na Hulanda. E tabata hunga pa e equipo VVGA.

Mirando cu e interes pa cu e deporte tabata asina grandi, e tempo ey a introduci na Hulanda "winter training" ya cu solamente den Verano tabata hunga beisball.

Den Invierno (winter) tabata practica den gymzaal pa asina keda toch den condicion.

NA 1969 A FUNDA ARUCAR

Na 1959, d'Arnault a regresa Aruba cu e creencia cu e lo haya trabao. Sin embargo e no a logra ya cu Aruba e tempo ey tabata pasando den mal tempo. Ta asina cu e refinaria di Shell a caba di cera, mientras cu Lago a bay over na automatizacion y tabata manda hopi hende cas.

Apesar di esaki, d'Arnault a solicita diferente lugar pero no por a haya trabao. No a keda nada otro cu cuminsa traha na cas mes como mecanico pero en realidad no ta esey tabata e deseo di d'Arnault ya cu no ta esey el a bay studia na Hulanda. d'Arnault su ambicion tabata crece y sigui crece.

Debi cu su mayornan ta di Surinam, el a bay dicho pais y aya su carera profesional a cuminsa.

Na Februari 1960 el a cuminsa traha cu un di e companianan mas grandi na Surinam. Na dicho compania el a traha como hefe. Na dado momento d'Arnault a haya dos aña off pa asina e por sigui studia na Apeldoorn y a optene su segundo diploma di auto techniek.

El a regresa Surinam y a bay traha na e mesun compania. Na Surinam d'Arnault a lanta dos garashi pa e compania y a worde promovi pa general manager.

Durante apertura di un di e garashinan, e compania a

worde ofreci pa establece un agencia di Volkswagen na Aruba.

d'Arnault tabata esun cu mester a traha e "feasibility study" y na 1968 el a bin Aruba pa haci e investigacionnan necesario.

Ora el a entrega su investigacion na e compania, el a ser puntra pa ehecuta esaki. Na 1969, d'Arnault a regresa Aruba y a funda Arucar caminda a cuminsa opera cu un trahador cu tabata su propio tata.

Su segundo empleado ta ainda Nicolaas Tromp, kende actualmente tin 23 aña den servicio.

Na Sabana Blanco caminda e fabrica bieu di aloë tabata, a traha Arucar. Ta asina cu ainda e edificio bieu tey y awor a ser converti den e bodyshop.

Na 1970 a construi un otro edificio nobo di Arucar cu te ainda ta existi. d'Arnault a splica cu como tabatin e crisis di petroleo na 1971-1972 venta di Volkswagen a cuminsa cay. Na 1974, buscando un alternativa pa Volkswagen ya cu prijs tabata subi, a haya oportunidad di tuma over Datsun.

Entretanto Arucar a bay bon. Tabata conta e tempo ey cu 35 empleado. Banda di Arucar y Datsun, d'Arnault a lanta un compania di carrental "Airways".

d'Arnault a splica DIARIO cu el a tuma Topcar over como un compania cu tabata bancarota. Via Arucar a compra mayoria di e accionnan y a pone esaki bek ariba pia.

Awendia por bisa cu Topcar ta e automotris number 2 actualmente na Aruba. Topcar tin 40 persona den servicio. Na 1983, d'Arnault a logra compra e edificio cu tabata di un compania di construccion cu a bay bancarota. Aki a introduci "recondition cars".

Na 1985 ora Lago a cera su portanan, recondition cars a coy forza y a sigui crece.

Actualmente Topcar ta pasando den un proceso di renovacion completo. d'Arnault a indica cu Topcar cu frecuencia ta manda trahadornan den extranheria. Tin entre otro 3 trahador cu a worde manda Japon pa un curso di 6 siman. Ademas di esaki, Topcar ta manda hende afor pa participa na seminaronan di Nissan.

Aki por mira claramente con ora bo kier logra un meta, bo mester tin boluntad pa esaki.